
Ўзбекистон Республикаси Президенти Шавкат Мирзиёев 2018 йил номини эълон қилди

Бугун, 22 декабрь куни пойтахтимиздаги Симпозиумлар саройида Ўзбекистон Республикаси Президенти Шавкат Мирзиёевнинг Ўзбекистон Республикаси Олий Мажлисиغا Мурожаатномаси эълон қилинди.

Президент мурожаати «Ўзбекистон 24» телеканали орқали жонли эфирда намойиш этилди.

Бу нуфузли анжуманда Олий Мажлис Сенати ва Қонунчилик палатаси аъзолари билан бирга, видеоконференция алоқа тизими орқали туман, шаҳар ва вилоятлардаги маҳаллий кенгашларга сайланган халқ депутатлари ҳамда барча бўғиндаги ижро ҳокимияти ва хўжалик бошқаруви органлари раҳбарлари, нодавлат ташкилотлар вакиллари кенг таркибда иштирок этди. Бундан ташқари, мамлакатимизнинг 33 та давлатдаги элчилари ҳам йиғилишда ўз жойларидан туриб иштирок этдилар. Мурожаатнома 2017 йилда амалга оширилган асосий ишлар якуни ва Ўзбекистон Республикасини 2018 йилда ижтимоий-иқтисодий ривожлантиришнинг энг устувор йўналишларига бағишланди.

Шавкат Мирзиёев йиғилишда нутқ сўзлади. Президент кириб келаётган янги — 2018 йилни Ўзбекистонда «Фаол тадбиркорлик, инновацион ғоялар ва технологияларни қўллаб-қувватлаш йили» деб эълон қилишни таклиф этди.

Ўзбекистон Президентининг бу таклифи йиғилганлар томонидан гулдурас қарсақлар билан қўллаб-қувватланди.

«Бу масала бўйича кўп ўйладик, кўп маслаҳатлашдик. Йил давомида келган кўплаб мурожаатлар, фикр-мулоҳазалар эътиборга олинди. Иш ўринларини яратмасак одамлар биздан рози бўлмайди, кўп муаммолар бор йўл йўқ, свет, газ йўқ, ногиронлар қанча, ҳаммасини яшириб юрдикку? Ном қўйишда жуда ўйладим, натижа бериши керак, чиройли қилиб кўчага ёзиб қўйиш эмас бу.

Мен янги – 2018 йилга юртимизда Фаол тадбиркорлик, инновацион ғоялар ва технологияларни қўллаб-қувватлаш йили, деб ном беришни таклиф этаман.

Янги фикр, ғоя, инновация бўлмаса, кейинги кунда юта олмаймиз, ҳар ҳоким бунини билиши керак», деди президент.

Маълумот учун, Ўзбекистонда 1997 йилдан бошлаб ҳар бир йилга шу давр ичида тараққиётнинг муҳим йўналишларини ифода этадиган ном бериш анъанага айланган.

Шунингдек, йиғилишда республикаимизнинг барча соҳалари, жумладан, ижтимоий-иқтисодий, банк-молия, савдо, инвестиция, суд-ҳуқуқ, қишлоқ хўжалиги, таълим тизими каби қатор муҳим йўналишлари, уларда эришилган ютуқ ҳамда камчиликлар ва албатта қилинадиган долзарб вазифалар президент томонидан кўрсатиб ўтилди.

Йиғилиш очиқ ва самимий руҳда ўтди.

Йиғилишнинг батафсил тафсилотларига сайтимиз орқали яна тўхталиб ўтамиз.

2017-12-22 15:17:35